



Il vitg militar sin l'Umbrail sco el sa preschentava tranter 1915 e 1918 en cumparegliaziun cun oz.

FOTOS SERVETSCH ARCHEOLOGIC ED ARCHIV CHANTUNAL

# Il Grischun posseda anc fastizs da l'emprima guerra

Archeologia da la neutralità – relicts da l'Emprima guerra mundiala

DA CLAUDIA CADRUVI / ANR

■ **Ilis archeologs grischuns rimnan il fastizs da l'Emprima guerra mundiala. Sco emprims en Svizra s'occupan els da l'inventarisaziun da foss da sajettar e serras cunter tancs.** Per il solit associeschan ins cun archeologia la tschertga da miraglias or dal temp roman u da restanzas dal temp dals cuvels. *Thomas Reitmaier*, il manader dal servetsch archeologic, va vias novas. A chaschun da l'onni commemorativ cumenza il servetsch ad inventarisar las restanzas da l'Emprima guerra mundiala. Fin il 2018 vul ins avair ina survista cumpleta dals «monuments». L'iniziativa grischuna sveglia interess er ordaifer il chantun: Il settember referescha Reitmaier en il Museum nazional a Turitg davart «archeologia da la neutralità – relicts da l'Emprima e Segunda guerra mundiala en il Grischun».

## La neutralità furma la cuntrada

Durant l'emprima guerra revega la tema ch'ils Tudestgs u Franzos marschian atras il pajais. L'armada svizra aveva da proteger il cunfin. Per la schuldada che aveva da star guardia era quai ina occupaziun unfisanta che strapatschava pazienza e gnarva. Il 2015 è l'Italia entrada en la guerra. La Svizra ha tuttenina stuì fortifigar il sid: en il Grischun oravant tut sin pass sco l'Umbrail, Bernina, Malögia, Alvra e Pass dal Fuorn.

Sumeagliant als chastès dal temp medieval hajan ilis indrizs militarics da l'Em-

prima guerra mundiala medemamain furmà la cuntrada svizra, explitgescha Reitmaier. La neutralità haja en quest senn influenzà la cumparsa da la cuntrada culturala. Ma entras erosiun, naiv, vent, turists ed alpegiaziun svaneschian quests monuments pli e pli. «En tschient onns n'èn els betg pli vesibels.»

## Cumanzà sin l'Umbrail

Ilis archeologs sa mettan savens pir a la lavur sch'in monument è gia sin svanir. Lura vegnan els clamads per forza anc spender insatge u almain per fotografar il fastizs d'antruras. Pertutgant ilis relicts da l'Emprima guerra mundiala vul Reitmaier reagir proactiv. Per las generaziuns vegnentas duai vegnir documentà quai ch'è anc avant maun.

La Val Müstair era fitg exponida e periclidada durant l'emprima guerra, explitgescha Reitmaier. Ins temiva là ina invasiun da l'armada taliana che avess pudì marschar vinavant fin Innsbruck. Perquai ha l'armada svizra fortifitgà il 1915 il Pass d'Umbrail. Plirs tschient schuldads svizzers han gi da star guardia stad ed enviern en foss e davos filfier cun spinas. Ilis schuldads talians eran per part postads be paucs meters da l'auter maun dals cunfins. Ilis foss da sajettar s'extendan fin sin 3000 meters sur mar. Sin l'Umbrail ha il servetsch archeologic cumenzà l'onni passà cun l'inventarisaziun.

## Latrinas per uffiziers e schuldada

Bain vesibels èn anc ilis foss da sajettar che duevan proteger la schuldada tranter au-

ter da stgaglias da granatas en cas d'ina attatga. Dal vitg militar sin l'Umbrail èn perencunter restads mo intgins mirs e muschnas. Cun agid da fotografias veglias sa lascha reconstruir nua che sa chattava la dimora da la truppa, la cuschina, il spital e la stalla da chavals. Igl è schizunt stà pussaivel da fastizar las rusnas da latrinas. Schuldads ed uffiziers avevan dal reminent latrinas da per sai.

Era la chava da crappa che l'armada ha duvrà per insumma pudair ereger entaifer paucas emnas il vitg militar han ilis archeologs documentà.

Davart il staziunament sin il Pass d'Umbrail exista blier material che gida a reconstruir la situaziun d'avant tschient onns. In grond agid è il relasch da fotografias da Heinrich Escher. Il litinent colonel ha fatg servetsch sin l'Umbrail ed il Malögia. 200 plattas da vaider cun negativs e dus albums da fotografias illustreschan quest temp.

## Mo pussaivel durant la stad

Questa stad cuntinua il servetsch ad inventarisar las restanzas en auters lieus. Sur la chavorgia da Püntcrap en il Grischun central existan per exempel fortiezzas ch'èn anc bain vesibels, schizunt sin google earth. Las lavurs en questas autezzas pon vegnir fatgas mo durant il temp da stad.

Per l'inventarisaziun impundan Reitmaier e ses team sulet duas u trais emnas ad onni. Tschel temp è reservà anc adina a l'archeologia classica cun ses monuments dal temp medieval e pli vegl.



Qua sa chattava la cuschina dal vitg militar sin l'Umbrail.



Restanzas dals foss da sajettar che van fin sin 3000 meters sur mar.



Stad ed enviern steva la schuldada svizra guardia als cunfins dal sid – qua a la Punta di Rims en la vischinanza da l'Umbrail.



Probabel l'ultim toc filfier cun spinas da l'emprima guerra che sa star-tuglia anc enturn in pal sin il Pass d'Umbrail.